

四庫全書

史部

欽定四庫全書

史部
浙江通志卷二百八十

詳校官給事中_臣戴璐

檢討_臣德生覆勘

總校官編修_臣倉聖脉

校對官編修_臣沈清藻

謄錄監生_臣朱衣

欽定四庫全書

浙江通志卷二百八十

雜記

下

山居新語元至元間杭州尚有火禁高彥敬克恭為江浙行省郎中知杭民藉手業以供衣食禁火則小民屋狹夜作點燈必遮藏隱蔽而為之是以數至火患遂弛其禁杭民賴是以安與廉叔度除成都火禁一意也

至正直記羅太無錢唐人故宋宦官也侍三宮入京
後以疾得賜外居閉門絕人事好讀書善識天文
地理藝術武夷杜伯原嘗師問之因得其秘乃姪
官至司徒權勢炎炎公卿莫不諛附遇歲朝司徒
請謁太無太無掩門不納司徒大呼以首觸扃太
無於戶內呼司徒名應之曰人道汝是太山我道
汝是冰山我老且病願乞骸骨若奏我歸杭州即
是敬我司徒於是特奏可其請太無以所積金帛

玩好皆散與鄰坊故人惟存書籍數十部束於車
後屬司徒曰我不依汝汝亦不可依勢至於再三
遂到杭逾年卒司徒者不遵其訓弄權不已遂以
妄受湖州人田土坐罪流遠方卒而太無乃得終
於鄉里可謂有先識矣杭州七寶寺乃羅司徒所
建者

輟耕錄汪佛奴歌兒也嘉興富戶濮樂閒以中統鈔
一千錠買為妾一日桂花盛開濮置酒佛奴奉觴

濮有憾於中潛然垂淚曰吾老矣非久於人世者
汝宜善事後人佛奴亦泣下誓無二志既而濮果
死佛奴獨居尼寺操行潔白以終其身

元史文宗本紀至順三年十月命浙江行省範銅造
和寧宣聖廟祭器凡百三十有五事

農田餘話至正庚寅江浙鄉試貢院中驚喧以為見
大蛇或言見怪獸莫測所在故試場以角端為題
樂郊私語海鹽私販每操兵飛棹往來賈販雖吏兵

莫之敢撓至正丁酉灤城范廉卿以廕補蘆涯巡檢為人恂恂儒者顧長騎射無論鳥獸不及飛竄雖海塗上跳魚子蟹之細射之百不失一夜每懸火竿上去竿三百步從暗中射火無不滅也於是亡命心懼毋敢私販境內為之肅然先是本路推官陳春以平反鹽獄數百人至是本路大僚曰使巡官人人如范何必陳司理平反也

樂郊私語海鹽州學有至元六年知州趙孟貫賈禧

重修碑至正六年知州葉彥中再修有碑三州守
皆有治聲趙字子唯台州黃巖人其祖子英為宋
宗室少卿南遷時以宗室從為黃巖丞遂家焉有
子六人皆以文學登膺仕至其孫師淵為太常丞
師夏為判宗皆受業紫陽之門且締姻焉故能以
禮世其家云賈字吉甫宛丘人治行以正羣佐老
胥肅然若家之奉其尊也葉字大中松陽人以才
敏有風操為江南行御史臺架閣管勾所至有績

可紀至於崇道重學則三君之雅意均也

輟耕錄武林錢思復先生

善明

年十六七時以詩見息

齋李公於州橋寓居既拜公公答拜命坐辭之再
公曰仲尼之席童子隅坐因不敢辭徐永之為江
浙提舉日客往訪之者無間親疎貴賤必送之門
外凡客請納步則曰不可婦人送迎不踰闕前輩
謙抑汲引後進者如此

蘭谿縣志金仁山先生

履祥

篤於分義有故人子坐累

母子分配隔遠不相聞者十年先生傾貲營購以歸其子後貴先生終不自言相見勞問而已

農田餘詒金華黃晉卿

潛

早年為湖州長興吏因簿

書被箠乃棄吏發憤讀書登進士為世名儒

雙槐歲抄四明陳桎嘗作宋鑑綱目筆其先世曰戶

部尚書顯者嘗論蔡京之奸不復仕顯孫曰吏部

尚書仲上章辨偽學諫韓侂冑北伐遂致仕仲子

曰工部尚書德剛請復濟王官爵端平中左遷而

卒德剛子曰太學博士著上書論賈似道奸邪出
判臨安府桎即著之孫也

湧幢小品顧圭上虞人死方國珍之難里人瘞尸於
江岸為風濤蕩析而塚獨完越七月其孤謀返葬
啟視面如生次日其地盡為江矣

蘭谿縣志吳綺字季可當蘭谿升為州時季可尚未
冠趨事於官衆嘉其能明初越國胡公海下蘭谿
遊兵四出居民竄匿季可見旗者曰願見總兵安

業以給軍餉引至帳下越國見之壯其言授以大
杖曰違律暴掠者用此杖之軍士皆懼衆賴以安
嚴州府志張士誠令其部將劉真據桐廬謀築城毀
安樂塔及牛山臨江扶欄取其磚石掘地作河以
取土居民苦於力役真性慘酷築土不堅者遂和
土築其中死者相枕藉既而真登鳳皇山瞰視曰
即此可以觀城中之虛實矣事遂寢今市中心及橫
港一帶隱然隆起者皆新城基也

水東日記洪武庚戌太祖將大封功臣遣使至台郡
訪唐和陵所賜錢武肅王鐵券十五世孫尚德捧
券及五王像以進寵遇優渥已而還其券與像以
禮敦遣而歸

吾學編周王橚洪武三年封吳國錢唐七年置杭州
護衛上以浙江財賦重地不可封王罷護衛改封
周

萬歷野獲編洪武四年辛亥始開科取士時自畿輔

外加行中書省凡十有一列中式者一百二十名而吾浙得三十一人蓋居四分之一而會元俞友仁復為仁和人首藩首科盛事如此是時劉基宋濂章溢王禕輩俱浙人一時同為開創名臣宜其聲氣之相感也

池北偶談明兩浙人物劉文成基為謀臣之首宋文

憲濂為文臣之首方正學孝孺為忠臣之首于忠

肅謙為功臣之首

禮賢錄劉基以母喪至家營葬時語所親以上必
當有天下之狀於是鄉里及隣附郡縣翕然心服
方氏雖據溫台明三郡其士大夫皆仰基如景星
慶雲上時使人以手書訪軍國事於基其書多自
製皆稱御諱頓首奉書伯溫老先生閣下而不名
古今奇聞類紀誠意伯劉公疾革時語其子云吾家
封爵當中絕然至五世後應得武職從茲可傳繼矣
至孫薦襲爵後果被革弘治初詔錄公後為處州

指揮使正五世矣時嫡孫以罪繫獄有司脫桎梏而冠服之人以為奇遇

王劍尊聞章溢奏定處州七縣稅糧比宋制畝加五合上特命青田縣糧止作五合起科餘准所擬曰使劉伯溫子孫世世為美談也

仰山脞錄章公溢始生時其音如鐘父母疑為不祥幾不舉及成童嶷然莊重不習鄉井輕儇態至正壬辰蘄寇犯龍泉公與從子存仁避亂山中存仁

為賊所得公曰吾兄止有一子不可使無後挺身
出語賊曰兒幼無所知我願代之賊素聞公名方
出重購求之及得公大喜欲問計公正色曰若等
皆有父母妻子顧為此滅族事耶賊怒繫之柱磨
其脇曰不降者死公曰吾終不為不義屈賊壯之
不敢加害公夜紿守者乘間脫歸避地閩中太祖
以東帛召公遂起為佐命勲臣

金華雜識宋漁師聞人夢吉又師吳萊萊師方韶父

永康胡長孺青田余學古學古師同邑王夢松夢
松師王味道味道則晦翁弟子也淵源之有自如
此

碧里雜存宋太史濂乞歸時御製詩二句餞之云白
下開尊話別離知君此後迹應稀濂續云臣身願
作衡陽雁一度秋風一度歸上悅賜白金緡幣文
綺曰與汝作百歲衣也自是歲一朝焉

菽園雜記宋景濂歿夔州府葬蓮花池山下成化間

墓壞巡撫池州孫公仁為遷葬成都適蜀王府宗承奉新作壽藏於成都東門外孫公求以葬先生承奉慨然許因此葬焉

傳信錄方孝孺先生未生時其父將葬其祖已擇某日矣忽夜夢一朱衣人前跪曰聞執事作尊翁藏於某山之原然吾九族居此已數百年子孫蕃衍不知其數再緩三日吾當徙避言訖辭去明日起工即得一穴濶六丈許中有赤蛇千共一穴其長數

尺蓋所夢之朱衣也先生父素不信鬼神積薪縱火焚之有烟一道直指先生之家是時母方妊數日先生生焉狀甚異舌能入鼻中後盡忠於建文君遭赤九族蓋蛇之報云

薰霞堂雜抄天台方孝孺少時嘗過嚴陵釣臺有古詩一章敬賢當遠色治國須齊家如何廢郭后寵此陰麗華糟糠之妻尚如此貧賤之交安足倚羊裘老子早見幾却向桐江釣烟水此不獨工於詩

亦天下第一等議論也

名勝志刑部尚書魏澤謫臨海典史時捕方正學家
不許容留一人公為悉力營護以出其孤謝文肅
詩所謂孫枝一葉存者也澤字彥恩

名勝志洪武初瑞安人卓敬年十三讀書山中夜歸
遇暴風雨遙見火光趨赴之乃一小院扁題體元
入見一老翁坐長明燈下起相勞苦令童子燃枯
葉為燎濕衣敬密問翁為誰童子曰先生不欲人

知其名惟自稱逍遙翁耳敬復修謹詢翁翁曰吾
世業醫往來中條山聞陶隱居有丹室在此南來
採藥不久將還郎君無用知也因與一牛騎歸及
抵家牛忽咆哮化一黑虎逸去比明尋訪小院不可
得數日後乃在縣西四十里陶弘景丹室故址有
古廟是雨夜所經行者其壁有潘閣夏日宿西禪
院詩筆墨猶新循其路歸見虎跡歷歷尚存

閒中今古錄象山錢唐元末隱而不見年將六旬見

四海定於一赴京敷陳王道先獻一詩詩曰大明
洪武元年春春雷一聲天地響龍飛在天雨如膏
天地山河增氣象山人昔住東海山山形如象山
名丹丹山之南有白石山人隱遁松林間一朝陰
氣蔽白日天地昏暗人變顏人既變顏心鐵黑山
人鐵心仍鐵肝山人名不掛唇齒山人不與人相
似吳江江上吳山青吳山有城高百雉好風吹步
上京師鐵杖薜鞋見天子天顏悅懌天開明謹身

殿中丞聖旨致君堯舜端有時山人事業當如此
詩奏即授刑部尚書

鎮海縣志鄞人單仲友能詩洪武中徵至南京獻詩
稱旨因奏本府名同國號請改之上喜曰彼處有
定海海定則波寧改明州曰寧波時洪武十四年
賜仲友還鄉考終於家

慈谿縣志陸俊入曹監明太祖視學令講論語問為
治何先後對以敬事而信三句上悅即日命知汀

州府

西園雜記寧海布衣葉兌上太祖書論武事一綱
三目其大意謂用兵之要在胸中有一定之規宜
北絕李察罕之招誘南併張九四之僭據督方國
珍之歸順取閩越之上地即建康以定都招江廣
以自資進則越兩淮窺中原而取天下退則保全
方面而自守此一定規模之綱領也其三目即一
取張九四二取溫台處三取福建時偽漢雖平而

元李平章察罕方以書招誘太祖故兄云云卒之
平吳平越平閩然後北伐混一天下次第皆如兄
言

餘冬序錄黃巖徐宗實屋洪武中為兵部侍郎奉使
兩淮多所建白海州有節婦侍小花年十六許嫁
而夫亡婦往夫家成喪持服養姑送終剪髮自誓
守節不二採訪使上其事所司以其年未五十不
合例宗實上言曰隨事處中始為合義守文執一

豈曰得宜厥婦既能哭夫於筮嫁之初又能剪髮
於葬姑之後雖矧目截耳亦無以加自當與立志
卓異同科豈與守節尋常比例朝論是其言下郡
邑旌之

萬厯野獲編嘉興有王嘉會者字元禮元末累舉不
第入明以明經應聘至京授翰林檢討洪武十五年
陞國子右司業與祭酒宋訥左司業龔穀嚴立楷
範三人俱春秋高鬚眉皓然太學數千人肅而畏

之以老疾乞歸特賜致仕未行而卒於官舍時年八十餘上命禮部應天府給舟車還葬發引之日又詔沿途有司祭之今鄉人已無能名之者矣

歸田詩話洪武間臨安宰王謙歲終行鄉飲酒禮選諸生少俊者十人習歌鹿鳴等篇吹笙撫琴以調其音節至日就講堂設宴席地而歌之器用壘爵執事擇吏卒巾服潔淨者賓主歡飲父老嘆息稱頌儼然有古風後遂以為常凡宴飲如會友則歌

伐木勞農則歌南山賀新居則歌斯干送征役則歌無衣待使客則歌皇華之類不用世俗伎樂識者是之

雙槐歲抄舟山下舊有狀元橋童謡謂狀元出定海
洪武二十七年縣人張信果應其識

西湖遊覽志餘洪武間詔選識字良家女及能讀大
誥者杭州以江干蔡氏應詔入宮署為女官永樂
初命蔡氏選識字女子於杭州後得其甥張氏應

詔亦為女官云

鳳洲雜編洪武三十年起取天下稅戶鄭沂入見授
禮部尚書以其從子幹為御史永樂十二年御史
七十二歲乞歸上曰教翰林院寫策書禮部宴用
正官陪教坊伎樂陞辭賜金綉衣楮帛幹舉從子
懋可用上曰御史舉也除御史後累遷大理寺丞
永樂十七年北京初受賀致仕御史幹及弟致仕
楷來朝賜宴及楮幣與為善陰隲二部上曰他家

人多與二十部十九年翰林檢討鄭叔美以告病
例為民仁宗立與子弟來朝上顧長者非鄭檢討
乎何為冠平巾呂震以故對上特詔予冠帶致仕
各賜鈔二千貫給驛舟還家

都公譚纂鄭尚書暘浦江義門人太祖嘗一日問尚
書汝家累世同居何以致之尚書叩首曰但不聽
婦人言耳上深然之

宗禎浦江縣志鄭氏五皓者監察御史幹蜀府長史

楷詹事府丞村翰林檢討棠清逸處士柏也一門
伯仲學優文行求之古今亦希覲焉

萬厯野獲編金寶者金華人永樂初生員上書陳王
道其綱有四其目有五上嘉納之又試策三道俱
稱旨遂命入文淵閣預修太祖實錄書成授翰林
典籍又預修永樂大典晉春坊司直郎洪熙中陞
衛王府長史正統四年充會試同考官以青衿為
纂修一異也以青宮近臣曳裾王門二異也以藩

府外僚膺衡文重任三異也是時官制已久定而金實獨承異數如此

天順日錄吏部尚書魏驥浙江人初為松江教官汲汲成就人才諸生在學者候一更盡必攜茶往視之見書聲者供茶一甌而反至三更將盡必攜粥以隨尚有誦書者供粥一碗且嘉其勤如此亦不頻數間旬一行士子咸感激後出其門者顯宦甚盛

萬厯野獲編仁宗初即位故宮僚左春坊左贊善徐善述卒於官贈太子少保謚文肅命有司立祠祀之宣宗初為文以祭徐字好古天台人起歲貢為桂陽州學正遷國子博士至今官凡考鄉試者二會試者二贊善從六品起九階而贈宮保且得謚賜祠諸君親洒翰祭之實為前所未有

湧幢小品袁柳莊珙之父號菊村其先有袁天與者以進士死德祐之難全家俱覆凡十七人僅一孤

救免又百餘年而有柳莊云

水東日記于節庵

諱

之先世有顯宦至其父幼孤貧

流落雖知其先世之貴而不能詳所知者黃鶴山
有先塋其兄弟名山壽海壽耳節庵既長為董鏞
先生壻先生藏書有黃文獻公潛集載湖南宣慰
于九思行狀可考節庵能知其先以得此文焉爾董
先生子中書舍人璵語及此事云

畜德錄孫原貞以實錄事至杭屬諸學生給事筆硯

時于肅愍公在列進曰學校之設將養賢以為用
耶抑供事書辦耶孫下席迎上座謝過遂與定交
水東日記于節庵以兵部侍郎巡撫河南遷大理少
卿入京不持土物賄當路汴人嘗誦其詩曰手帕
蘑菇與線香本資民用反為殃清風兩袖朝天去
免得閭閻話短長

玉劍尊聞于謙為兵部尚書寇犯西北貴州苗大起
二廣四川復用兵警報旁午謙目視指屈口為奏

二史從旁錄錄常不及

瑣綴錄景泰間用人多密訪於少保謙時缺祭酒翰林徐有貞求補以門生楊宜為少保內姻託為之請至於再四少保曲意從之因中使言於上一日退朝宣少保至文華殿辟左右諭曰徐有貞雖有詞華然其存心奸邪豈堪為祭酒若從汝用之將使後生秀才皆被他教壞了心術少保不能對惟叩頭而已退則汗出浹背左右遙聞祭酒之說而

未悉有貞竟不得知遂銜少保後果誣以重罪

萬厯野獲編宣德初年添設浙江杭嘉二府屬縣勸

農主簿

菽園雜記吳文恪公訥為御史巡按兩浙時壞秦檜
碑因刻石記曰右宣聖及七十二弟子贊宗高宗
製并書其像則李龍眠所畫也高宗南渡建行宮
於杭紹興十四年正月始即岳飛第作太學三月
臨幸首製先聖贊後自顏淵而下亦撰辭以致褒

崇之意二十六年十二月刻石於學附以太師尚書左僕射同中書門下平章事兼樞密使秦檜記檜之言曰孔聖以儒道設教弟子皆無邪雜背違於道者今縉紳之習或未純乎儒術顧馳狙詐權譎之說以僥倖於功利其意蓋為當時言恢復者發也嗚呼靖康之禍汴都淪覆當時臣子正宜枕戈嘗膽以圖恢復而檜力主和議攘斥衆謀盡指一時忠義之言為狙詐權譎之論先儒朱熹謂其

倡邪說以誤國其罪上通於天萬死不足以贖者是也昔龜山楊先生時嘗建議罷王安石孔廟配享識者趨之訥一介書生幸際聖明備員風紀茲於仁和縣學得觀石刻見檜之記尚與圖贊並存因命磨去其文使邪說之說奸穢之名不得廁於聖賢圖像之後然念流傳已久謹用備識俾後覽者得有所考云

萬厯嘉善縣志大理卿胡緊將析縣命知府齊公政

相地齊欲定縣於西塘鎮有成議矣胡詢諸父老
陶莊里民袁顥方弱冠進曰建邑者最上論國計
次論人情又次論地勢西塘僻處一隅非扼塞要
會武塘海濱孔道郡之東藩地方有警可以扼吭
又商旅往來民易成聚胡大然之遂挾輿偕行自
嘉興東來先閱武塘四水皆直胡不甚樂及抵西
塘見南北諸流皆會於文水漾召顥語云國計民
情爾言當矣如地勢何顥曰西塘二水雖合勢實

傾邪武塘雖直勢甚平正觀形者得其偽察理者
得其真古者太史視土較輕重試秤之優劣判矣
胡命取二鎮土秤之果武塘重遂定治焉

天啟慈谿縣志王母張氏其父為餘姚張雲航先生
有隱德善識鑒每奇其女教之經義適慈谿王明
白之子伯堦為金溪令有能聲雲航嘗囑其女曰
得甥當告我舉首子以告視之曰來矣名之曰來
再舉子再告曰復來矣名之曰復既以第三甥告

曰亦足與兄鼎足而立名之曰鼎來復同中宣德
丙午科來為工部尚書復為刑部主事鼎為御史
終廣東僉事張封太夫人相夫教子一以古人為
法金溪既歿手書箴訓諄諄以竭忠報主為規來
征湖廣時手製汗衫遺之云非為不足汝所特使
汝知我尚康庶得安心王事不以我老為念耳及
凱還復戒以毋自矜伐以全居美之道母賢而子
並顯真盛事也

靜志居詩話漏侍御瑜潛迹江湖締交耆舊宣德中
在烏墩為九老之會時趙曦伯高年九十一吳煥
汝文年九十趙岐伯通年八十九孫孟吉兆禎唐
其諒年八十五水宗遠朝宗年八十二叔瑜與壺
敏中行錢郁耀宇年皆八十餘時人有詩紀其事
云景迫桑榆盡日間更邀同志效香山尋常樽酒
頻酬勸適意林泉任往還心遠自忘塵世事年來
不鎖利名關莫言九老非前比養得天和總一般

流傳以為佳話。蟻宋安定郡王。後洪武中官儀鸞
司序班。岐安康郡王。後孟吉。革除間太常博士。其
諒革除間以文史院出署天長丞。郁湖廣石門知
縣。蟻煥。孟吉。敏。皆烏墩人。岐青鎮人。宗達。吳江人。
其諒。鳳陽人。郁。臨安人。烏墩一曰烏戍。亦曰烏鎮。
又曰烏陀。青鎮即青墩也。

宛委餘編。杭州耆老會。在正統間。大理正卿郎子貞。
八十一封吏部員外郎。孔希德。八十禮部郎中。蔣

廷暉七十八處士項伯藏九十三孫適郭文敏皆
七十三又有稽勲郎中鄧林布政使姚肇以寓公
與會而年不及

水東日記商弘載輅家藏宋時公牒一紙內凡朝廷
語言皆朱書蓋其先本西夏人以獻密有功送浙
中意與今安插降人相類所居淳安族頗繁衍蓋
四百年於茲矣

菽園雜記商文毅公輅父為府吏公生時知府夜遙

見吏舍有光跡之非火也翼日問羣吏云商某生一子知府異之語其父善撫之後仕至大學士天順初罷歸有醫善太素脈公命診之云歇祿十年當再起成化初復起入閣數年致仕

王劍尊聞商文毅致政歸劉文安定之見其子孫多賢嘆曰吾與公同處未嘗見筆下妄殺一人宜子孫若是

萬厯野獲編景泰自郕王即位推恩藩邸舊臣以審

理正俞綱為太僕寺少卿嘉興人也以伴讀俞山為鴻臚寺丞秀水人也二邑俱附郭同時同姓綱以生員習字選山以舉人副榜起綱次年即以兵部左侍郎入內閣山次年亦至吏部左侍郎為經筵講官尋因易儲綱加太子少保山加太子少傅俱為宮銜二品而不得正拜六卿然得兼支二俸後山密請復儲不聽遂引疾以優禮致仕天順元年卒綱於天順復辟再起南京禮部左侍郎成化

二年致仕十四年卒賜祭葬如例則景泰舊臣所
無者綱字元立山字積之

湯斌明史稿考惠皇太后邵氏杭州昌化人知書年
十四聘者七人皆死一指揮聘之已上馬迎矣墜
而死其父林充漕卒攜至京師入掖庭成化十二
年冊為宸妃二十三年封貴妃生興王祐杭岐王
祐榆雍王祐檮世宗入繼大統上尊號曰壽安皇
太后封弟喜昌化伯

嘉禾徵獻錄安妃姚氏名妙莊嘉興人父敬生妃有
異徵嘗因盥漱見醕水中羽扇夾兩旁日月雲霞
爛然五色長而端靜家貧習繡績貿易每出必俟
日中後市闐屏息乃就市行止必從中道目無忤
視人多奇之年十五憲廟遣中人懷恩選淑女江
南妃名上籍中素寡髮不盈尺一夕髮長委地入
宮生第九皇子壽王祐稽尋拜安妃父母皆已物
故惟敬弟玉之子福員貧甚販菜於市詔下有司

訪親屬物色得之即授錦衣衛千戶時人為之語
曰誰氏子賣青梅朝藍縷夕錦衣王以弘治四年
冊封藩邸在蜀之保寧妃亦從之尋薨謚曰端懿
福員子錦孫承勲皆世襲承勲子思孝無子工部
尚書思仁蓋福員五世孫也

西園雜記成化庚子浙江鄉試填榜第一卷得餘姚
王冢宰華時憲長楊公子方以華儒士抑寘第二
而以仁和李亞卿旻為榜首明年辛丑王狀元及

第至甲辰科李亦及第一科二狀元盛矣李之會
試也癸卯冬十二月發舟行至毘陵同行二人好
飲博相忿爭一人持刀刺之誤中李肩李驚悔即
別二人返舟抵家已歲除矣甲辰新正親友促其
行李乃齋沐禱於嚮卜以決行止至清河坊北有
唱新狀元花生滿路來者李聞之即治裝初六日
起程二月抵京明日赴部投文則席舍圖已掛部
中不納李苦告尚書云汝第往觀席舍圖有空處

便收汝李亟往觀圖尚缺其一禮部方為收卷填
圖尚書笑曰那爭汝一個作狀元耶是春果及第
間中今古錄吾浙狀元自正統元年丙辰科周旋十
年乙丑科商輅成化十一年乙未科謝遷十七年
辛丑科王華二十年甲辰科李旻五人之中周與
商王與李俱同鄉舉一舉兩狀元固可美而商謝
李俱發解首商之三元開科以來一人商與謝又
皆入閣尤為盛事也

王劍尊聞有以王華同年事誣毀華者人謂華當速
白王曰若白之是我訐吾同年友矣是焉能免我
哉竟不辨華四世祖性廣東叅議峒苗為亂死之
曾祖與準精於易嘗筮易得震之大有曰吾後再
世其興興其久乎

七修類稿浙省十一府七十二縣一州成化間分縣
後共七十六矣有演成歌括云杭九嘉湖七台嚴
皆六邑寧衢與溫五紹金八處十

菽園雜記浙江銀課洪武間歲辦二千八百七十餘兩永樂間增至七萬七千五百五十餘兩宣德間增至八萬七千五百八十餘兩後鎮守太監李德兵部尚書孫原貞奏坑戶實辦銀二萬五千七百九十餘兩賠納六萬一千七百八十餘兩正統間減數止辦三萬八千九百三十餘兩景泰七年實得一萬六千零六十五兩天順六年三萬零四十八兩成化三年奉勅辦銀二萬一千二百五十兩

成化五年減數一萬零二百三十七兩有奇因太監盧永之奏也未幾又奉勅照天順六年三萬四十八兩成化十九年又因太監張慶之奏照成化三年二萬一千二百五十兩以後額辦處州府所屬各縣二萬一千二百五十兩温州府泰順縣九百九十一兩八錢共二萬二千二百四十一兩比之成化三年額數多九百九十一兩弘治三年減免一萬一千四百兩止辦解一萬零八百四十一

兩又禁取額外耗銀三千餘兩從巡按御史暢亨之請而刑部侍郎彭韶覈實其事也

續停驂錄天下稅糧共二十九百四十三萬餘浙江一布政司二百七十五萬二千餘當天下九分之

一

篝燈碎詔弘治四年浙西大饑致仕太子少保禮部尚書餘杭鄒康靖公幹疏聞乞差官體勘災荒地方寬免今年租稅敬皇帝嘉納之勅有司綠帛羊

酒存問

萬厯野獲編弘治五年壬子浙江鄉試首場遇大雨
漂沒號舍不能坐立士子譁擾競散而出約束之
不能止監臨御史監察憲臣俱欲罷試左布政劉
大夏曰暴雨必有息時可令自揣能文者聽其願
留勿隨衆去當以留者為準閱其文登榜於是留
者尚有八百餘人悉命還號舍雨果止於是仍如
額取足數比出榜人謂得人勝他科

兩湖塵談弘治初鏡川楊公守陳以少詹事視院篆
碧川楊公守阯以侍讀掌南京翰林縉紳相語以
為兄弟對掌南北詞林近世所未有碧川有詩曰
天風吹斷鴈鴻行霄漢平分兩玉堂小弟初懷南
署印大兄又綰北門章累累不是權家客奕奕同
依帝德光仰止前修稱二趙絲綸對掌並流芳

西園雜記楊守陳為學士弟守阯從弟守隅守隨子
茂元茂仁皆相繼登進士同官於京好事者作春

聯以侈之云半壁宮花春宴罷滿床牙笏早朝回
後文懿官至吏侍守陞至吏書守隨至工書謚康
簡守隅至大理卿茂元至刑侍茂仁至按察使皆
有賢名昆弟子姓一時之盛江浙文獻之家鮮能
儼焉

先進遺風謝文正公遷初入翰林有御史驟陞都憲
臺中循例丐公言為賀公諗其人素不為公議所
與竟辭不作

萬厯野獲編謝木齋遷之相也以丁憂召用時弘治
乙卯尚為侍講學士從五品特起以少詹兼學士
入直內閣因服未滿留家半年抵京甫到任即陞
正詹二年即晉太子少保兵部尚書東閣大學士
一時大臣崇進未有如此之迅捷者

玉劍尊聞雁山五珍謂龍湫茶觀音竹金星草山藥
官香魚也朱太守諫無宦情嘗曰豈以五斗易我
五珍

見聞紀訓歸安施相之名佐翊之名佑兄弟俱為知
州致仕家居田產叅差有唇齒之隙親友日為處
分不能解同邑溪亭嚴公鳳素以孝友著聞事兄
如父是時偶過翊之舟中語及產事公頻蹙曰吾
兄懦吾正苦之使得如今兄力量可以盡奪吾田
吾復何憂翊之乃惻然感悟遂拉溪亭同至兄宅
且拜且泣深自悔責而相之亦涕泣慰解各欲以
田相讓遂友愛終身

靜志居詩話項襄毅忠以功業顯其里居日結樵李
耆英之會月一集於僧房道院中同會者雲南布
政司叅議金禮敬之四川按察司僉事梅江文淵
福建按察司僉事戴祐元吉漳州知府姜諒用真
武岡知州伍方公矩礪山知縣包萬汝和通判湯
彥和教授陳蒙福主之者公也始於弘治戊午春
所賦詩文文淵彙為一集府學教授新淦蕭子鵬
序之比於香山洛社云

嘉禾徵獻錄沈氏秀水人聰慧能屬文少選入宮為
女給事中孝宗嘗試六宮守宮論沈文最佳其發
端云甚矣秦之無道也宮何必守哉上悅擢為第
一弟溥為貢士就試春官沈贈以詩云自少辭家
侍禁闈人間天上兩依稀朝隨鳳輦趨青瑣夕捧
鸞書入紫薇銀燭燒殘空有淚玉釵敲斷竟無歸
年來望爾登仙籍同補山龍上袞衣時競傳誦之
靜志居詩詒南元善詩大好青紫囊書妙善占基其守

紹興謂窆石非禹葬處別於廟東南建豐碑題曰
大禹陵其後望秩於是處焉

杭州府志仁和縣學石經正德中巡按御史張承仁
欲徙置府學教諭李璧力爭之承仁曰吾徙府學
非私之也何執焉璧曰璧官仁和學知為學守故
物而已他非所知也承仁怒欲撻之璧曰官可去
身不可辱去官而移石經非典守責矣官猶在也
豈可以威奪乎承仁異之事竟寢迨璧去後巡按

宋廷佐遂遷之府學

萬厯杭州府志正德十五年御史唐鳳儀巡按浙江時胡世寧初起拜湖廣按察之命未上鳳儀重其人欲為建坊世寧謝曰賴主上寬仁得免罪戾幸矣何以坊為唐有僕射褚遂良者里人也當時諫易后忠莫大焉明四川按察僉事王琦兵部郎中項麒皆與同里清望重一時若移樹坊之工為三公表世教民風所益良厚鳳儀遂為樹忠清里坊

於褚家堂南巷口

禪寄筆談胡端敏公

世

志節清峻以昌化諸生中鄉

試第二登進士方舉時牌坊路費例百金公以歲
侵僅受五十金公起家力田即迴異儔輩如此

今言王陽明

字

初見宸濠佯言售意以窺逆謀宴時

李士實在坐濠言康陵政事缺失外示愁嘆士實
曰世豈無湯武耶陽明曰湯武亦須伊呂濠又曰
有湯武便有伊呂陽明曰若有伊呂何患無夷齊

自是陽明始知宸濠逆謀決矣乃遣其門生舉人
冀元亨往來濠邨覘其動靜益得其詳於是始上
疏言臣據江西上流連歲盜起乞假臣提督軍務
之權以便行事意在濠也司馬王晉溪知陽明意
覆奏稱王某有本之學有用之才今此奏相應准
允給與旗牌便宜行事江西一應大小緩急賊情
悉聽王某隨機撫勦以故濠反陽明竟得起兵擒
賊捷奏歸功本兵新都故不喜晉溪見陽明奏遂

怒故封爵久不行

四友齋叢說陽明既擒宸濠囚於浙省時武宗南幸
駐蹕留都中官誘陽明令放還江西以待聖駕親
征差二中貴至浙省諭旨陽明責中官具領狀中
官懼其事乃寢因張燕於鎮海樓酒半撤梯出書
簡二篋示之皆此輩闕通之蹟也盡數與之二中
貴感謝不已迤南都力保陽明無他遂免於禍

緒山文錄叙說陽明先生甲申年居越中秋月白如

洗乃燕集羣弟子於天泉橋酒半行先生命歌詩
諸弟子比音而作翕然如協金石少間能琴者理
絲善簫者吹竹或投壺聚算或鼓棹而歌遠近相
答先生顧而樂之遂即席賦詩有曰鏗然舍瑟春
風裏點也雖狂得我情先生自辛巳年初歸越侍
者尚寥落既而四方來者日衆癸未以後環先生
之室而居每一室常合食者數十人夜無臥所更
番就席歌聲徹旦南鎮禹穴陽明洞諸山遠近

古刹無非同志寓遊之地

解頤詩話王陽明嘗遊一僧寺見一室封鎖甚密欲
開視之寺僧不可云中有入定僧閉門五十年矣
陽明固使開視之見一僧儼然如生貌酷肖己曰
此豈吾之前身乎既而見壁間一詩云五十年前
王守仁開闢即是閉關人精靈剝後還歸復始信
禪門不壞身陽明悵然久之建塔以瘞而去

見只編劉方伯烺居官最廉嘗見其手錄私記自縣

令以至藩司每官識其所積蓋守令積俸亦有數
百金若臬副至方伯每任不過百金而已鄭端簡
公晚撰方伯父威縣公墓誌以縣令進部郎尋卒
盜中止餘脫粟數斗不能具殮清白家風傳之有
素也

四友齋叢說章樸菴極清操樸畧與楓山等其致仕
回家有俸四五百金楓山知之大不樂曰汝此行
大有生息樸菴有慚色

見只編鄭端簡公晚家規雖宴貴客不使粉墨登場

雖給用有羨不營子母之利雖子孫繁衍無一人
入歌妓之室者此規至今行之誠縉紳家久遠之
藥石也

長興縣志長城縉紳大家城中有三曰顧大司寇應
祥姚京兆一元徐方伯中行司寇位望差勝京兆
而京兆子孫繁衍彬彬文彩大勝司寇京兆與方
伯同時里居方伯坐客恒滿京兆杜門不妄交一

人家法清肅即諸孫方童自鄉塾歸入揖必正衣冠見之有萬石君家風

靜志居詩話韋南荅商臣世為廉吏時以比胡威父子歸田後與蔣恭靖瑤劉清惠麟孫僉事濟蔡同知杞唐主事樞陳叅政良謨顧尚書應祥吳太僕龍朱太守懷幹張通政寰施知州佑李知縣丙吳副使麟叅政龍一十五人結峴山逸老之社雖饒黷不給而春秋必赴能不改其樂云

靜志居詩話徐東濱

咸

為豐厓同母弟昆友皆嫺風

雅歸田後築園城闌名曰餘春中疊石為小東山
與錢東畬太守朱西村山人輩結小瀛洲十老社
其後倭人入寇所在焚儲積遂舍園基以為倉焉
嘉興縣志屠應竣居秋涇有鄉人貧甚負其子孟元
銀以屋基及小塋立契償之其子故長者不肯受
曰吾當另酬汝直前銀不復追也隣人不勝感激
及竣歸鄰人來訪訴其子之厚德竣曰房已售爾

今何居曰移某所竣命其子取還前契且為築其墳基

王劍尊聞明制不得兼封本生父母諸大綬修撰滿考疏請貤封情詞懇惻肅皇許之生母卒制不得服大綬衰經疏水不赴闕當事矜其情為請於上得服本生嗣是廷臣凡為人後者咸得貤封及服本生人推大綬為孝能錫類

賈齊雜著常濱何侯祉涖郡有萬叅政廷彩者欲加

賦嘉興什之一名以濕潤嘉興賦六十萬餘其濕潤亦六萬餘而濕潤例自湖州守劉公天和病取民之濫也欲為畫一令於平米外輸十一繼守刻核謂是已在官遂令正支萬公謂嘉湖一也於是白巡撫欲如湖例用代浙東災傷之輸運艘渡江之費檄下侯曰嘉興固無濕潤非湖比也乃自治文書陳不可狀萬公怒以為抗已督責愈嚴間以言侵侯侯弗為動因又陳之御史達撫臺咸如議

報罷

萬厯野獲編吾浙科名最盛嘉靖戊戌慈谿袁元峰
煒以鄉舉第二人登會元廷試探花刻一印記曰
天下一二三人向來無與為對者至萬厯己丑會
稽陶石簣望齡繼之其鄉會大對名次與袁不爽
相去五十年又同二百里內人也後又十五年而
慈谿楊崑阜守勤亦以鄉試第二登甲辰會狀科
名又勝袁且同一邑志趣亦頗相似云又有楊守

陞為鄞縣人以鄉試第三登成化戊戌會試第四
廷試第二亦分占三名而少第一其嫡兄守陳已
先中浙江解元恰補之後守陳守陞同官詞林又
同為翰林學士對掌南北詞林印且與袁文榮同
郡亦浙中佳話也

窺天外乘有一邑而前後盛事若合符節者台州金
學憲賁亨三子長立愛次立敬又次立相俱中式
計偕立愛立敬俱第立相次科亦中俱官南都迎

父以養又王宗沐三子長士琦次士崧又次士昌亦同計偕士琦士崧俱第士昌次科亦中

討桂編倭巢沈莊總制胡公

宗憲

覓善說者衆莫應庠

生沈維錡慨然請往胡問汝何策以動之錡曰倭巢錡室當以主人禮進錡有繞舍田數百畝因寇荒蕪國課無措誘彼屯田徐圖說之胡服其議錡儒服入倭叢中為叙主客禮談論頗洽因說以耕種之利并為畫久遠計而陰俟大兵四集後卒殲

倭實錡本謀也

戒菴漫筆蔣生名洲字信之陳生名可願字敬修皆
鄞人同為郡庠生嘉靖二十九年倭人王直寇邊
無虛日言官奏請懸立賞格曰有能生獲王直者
予萬金封伯有能使海致王直降者予世襲指揮
僉事人難之莫敢行蔣生請行又薦陳生行三十
四年八月以蔣生為正使陳生副之充市舶司員
率若干人以往九月出鄞江桃花渡至馬嘴滙風

颶舟半覆得救起至小衢山遇寇二生率衆與戰
賊敗去則兵器火藥等大半耗矣乃回舟舟山蔣
生念緩急惟已移書家人貫田產備具官為給券
紀之凡六日夜入大洋又四日抵五島其長來見
譯知上國使其修禮敬二生因諭宣諭日本王意
其長曰日本王權在豐後山口二國當往諭豐後
山口天使行吾以船人導則又密知王直處使密
使往諭直來殊倨傲又密諭之曰即不念汝祖宗

墳墓獨不為老母妻子計乎今中國知汝出無奈
不甚罪汝募汝歸誠以此時歸正朝廷豈薄汝將
官之海藩節鎮矣乃借區區數島與中國之衆久
抗衡不祥莫甚况倭情貪狡即一日下片紙檄曰
能以叛賊某來者勞千金恐汝頭與貢使俱北也
去醜穢而就榮名孰與身死累老母妻子哉直悟
謹拜諾因定歸計二生與直同行二國先至平戶
平戶長禮敬導送如五島會聞巨賊徐海且率衆

人寇恐我軍無備三十五年春陳生先以王直子
激養子毛臣葉宗滿王汝賢善譯辨者夏正等歸
報已而蔣生行至博多知山口國荒亂不可往謀
先往豐後國豐後王源義鎮與山口王源義長兄
弟也源義鎮接蔣生禮恭蔣生曲諭以邊寇利害
義鎮引罪會山口國使來蔣生又至山口源義長
接禮尤恭又會同豐後禁諸倭寇邊又遣使修貢
獻以謝罪三十六年蔣生以王直歸歸途安焉無

盜賊如去時方陳生歸時適徐海寇桐鄉桐鄉大
困都御史阮鶚困不知計陳生及夏正說海而解
其圍計擒海等又葉宗滿覆舟山賊黨皆陳生以
賊攻賊云王直至城下猶觀望持兩端時直衆猶
盛乃胡宗憲與王激等同臥起甚交歡遂授計夏
正為好辭以激易直乃執之竟論誅死王激亡海
葉宗滿王汝賢未減論戍直死時再呼蔣洲陳可
願誤我誤我直誅而黨與散矣當時有害功者并

二生諳之漫為蜚語二生竟落格廢賞宗憲為之
輸粟為太學生

天啓平湖縣志沈坤居平湖之西麓家頗饒嘉靖間
以門戶充役集收銀米遇歲饑坤悉散家貲并所
收銀米以療饑民官督之無以應甘罪獄中會倭
寇猝臨總督胡公募勇敢之士聞坤名出獄留募
下一日值戰王江涇我軍失利胡被圍坤子惟敬
甫弱冠單騎突圍中挾胡而出胡益愛重坤授千

總職部兵三千父子設計偽裝犒軍藥酒手執公文經倭營度倭追將近棄舟度水走倭得酒喜爭飲而死者無算

靜志居詩話嘉則

沈明臣

文長

徐渭

同在胡少保

宗憲

幕府

並受知遇督府周防嚴密文長恒戴敝烏巾衣白布澣衣非時闖入或出昵飲夜深猶開戟戶以待嘉則嶽嶽不阿少保遙望見必起立嘗譙將士於爛柯山酒酣樂作嘉則於席上賦凱歌十章吟至

狹巷短兵相接處殺人如草不聞聲少保起將其
鬚曰何物沈郎雄快乃爾命刻石置山上

列朝詩集小傳茅順甫坤自命有文武才好談兵事

嘉靖末年東南中倭胡績溪為制府以同年生虛
心咨訪料敵設謀用順甫之策為多順甫亦沾沾
自喜以為扣囊底餘智猶足以辦倭也

歐餘漫錄孫太初元寓武林南屏山常畜一鶴自隨

與許給諫杞泉子相善許為置田三畝歲輸粟於

萬峰深處以充鶴糧而作券與之曰太白山人鶴
田在九杞山書院之陽倚山面湖左林右涂廣從
百步計歲入粟三石有奇以其奇為道里費而歸
其成數於杭之西湖南屏山鯨歲則汰其半以主
人潤筆金取盈焉佃之者主人之隣某輸之者主
人之僕某董之者主人之弟某主人謂誰山人之
友杞泉子許台仲甫也後太初開籠調鶴飛去乃
用唐人想伊只在秋江上之句首尾作詩六律兩

人風趣雖林君復亦當欣讓矣

見只編許九杞先生

卿相

以敢諫肥遯最為夏文愍公

言所重文愍再召道經嘉禾以書致先生與決進

止時藩臬郡縣艤舟祇候道相望也先生葛巾荔
帶刺一小舸詣夏夏問僕此出何如許不荅第言
可惜李長源受觀察判官夏正襟起謝曰便當疏
辭以奉明教須臾撾鼓迴帆諸祇候一時星散夏
憮然遂不果辭卒及於難

靜志居詩話京尹查性甫

秉彝

為諸生時夢受杖暗室

中仰見廟額懸天上春回四字後任戶科給事中
上疏劾嚴氏父子詔廷杖六十謫定邊典史恍憶
前夢因賦詩云九重天上春回日二十年前夢裏
身

穀山筆塵山陰大司馬吳兄新鄭

高拱

門人也隆慶丁

卯新鄭為華亭

徐階

所逐門生故吏無一敢送者惟

吳送至潞河舟中握手垂泣而別

王劍尊聞吳司馬兌居塞上烽燧頻告檄書紛然將吏還集方閉戶就睡意飽後起據案酬務應機曲當

王劍尊聞大司馬郭宗臯甚貧其長子學書不成無所資賴故人同里咸薄其落魄乃走宣大軍門求見吳兌自効吳憐而收之存卹甚至每與諸將大會面命曰若等毋以郭公子阮不相提挈視之當如吾子兌嘗言吾總六鎮錢流沒蹕為富翁易

耳每思多財則多田業僮僕徵責訟愬歲且百出
守之甚勞居之甚苦今雖稍貧然省事少爭其樂
差勝耳家居十餘歲未嘗入郡郭就見長吏

韻石齋筆談項元汴墨林生嘉隆承平之世資力雄
贍購求法書名畫及鼎彝奇器三吳珍秘歸之如
流癸酉歲兵至嘉禾項氏累世之藏盡為千夫長
汪六水所掠蕩然無遺

萬厯野獲編浙東誠意新建二家俱世襲劉傳至裔

孫世延以狼戾好訐逐回青田受錮後始得釋王氏封而旋奪至隆慶初始復故爵其子正億得襲子承勛繼之

彤史拾遺記神宗皇后王氏餘姚人生京師父偉以后貴封永年伯萬歷六年孝定太后為神宗擇配冊后為皇后后性端謹上因承平久天下無事中后好靜攝一切章奏盡留中不下后封識藏弄每詔一事即隨取上之光宗在東宮危疑數矣后調

護備至且善事太后得其歡心上寵幸鄭貴妃置之不較宮中皆稱后盛德比孝貞焉后與新建伯守仁同族時守仁孫承勛方襲爵上嘗問后家有官乎后對曰猶記新建伯妾猶子行也見在京翼日召見坤寧宮賞賚甚厚時稱餘姚王氏有二伯聞者榮之

玉劍尊聞孫文恪妻楊氏為詩麗而則教諸子如嚴師鑪嘗戒其友曰以札來者幸毋詭母譴歷吾母

而後及我慎之也由此子姓所交無匪人所聞無
匪言

王劍尊聞倪凍字霖仲上虞人戶部尚書元璐之父
也為荊州太守相居正卒羣張慄甚屬所親乘間
言倪笑曰往者令偃僂致恭事即不可知苟云強
項又何虞乎待羣張有加田千頃為勢家所侵悉
徵予之人以是服倪厚德

王劍尊聞丁賓為句容令當歲大歉輕輿簡從徧歷

下戶噢咻勞來至一舍進麥飯棘口賓飽嘗而倍
酬之比過其隣出白粲新韭賓嘆曰胡不均乃爾
責其人分五斗遺進麥飯者

臨海縣志萬歷癸未甲申間大宗伯秦公鳴雷冢宰
何公寬少司空金公立敬少司寇王公宗沐俱在
林下時人謂之四京堂倣古九老者英終日稱觴
聚會談涉時事與人短長輒嘿不置一言其風致
如此

萬厯嘉善縣志邑民李懷玉等始為真率飲尊齒德也適孫詢致政還改為耆英文會約里中斑白知禮讓者十二人按一年月朔之數併詢為十三則餘閏也月朔謀小酌自初至末周而復始其日不宰牲不用樂不戲言不談世務殺以魚肉果以時品命子弟講禮讀法歌詩撫琴習奢惡儉者弗與焉嗣後此會不復再舉至萬厯丙申邑侯章士雅加意敬老延邑士大夫之耆耄者為耆英勝會時

與會者盛唐八十八曹德修八十五呂洙八十一
姜圻八十一孫嵐八十八張可大八十三凡六人
市廛皆結綵列綺筵張聲樂社師率童子歌南山
之章邑中侈為曠典焉

萬厯野獲編萬厯壬辰孫立峰鑪拜吏部尚書紹興
餘姚人也左侍郎羅康洲萬化則紹興之會稽人
右侍郎陳心穀百年則又餘姚人一時同領銓柄
最為我浙盛事未幾孫去位而陳即以南京宰改

北孫之前又平湖之陸五臺光祖亦浙人也此後
不可得矣

萬厯野獲編父子得諡以為盛事然未有三世得之
者餘姚孫氏第一世右副都御史贈禮部尚書諡忠
烈燧第二世南京禮部尚書贈太子少保諡文恪
陞第三世吏部尚書贈太子太保諡恭簡鑪且世
以忠孝清白見稱鑪兄弟四人俱致位列卿名德
無忝真盛事也

靜志居詩話劉戡山先生周宗家居恒服紫花布衣士

大夫爭效之布為長價吳江趙士諤知會稽縣嘗

問先生疾造榻前出而嘆曰豈意今日得覩管幼

安萬歷丁巳京察議及先生士諤時為考功郎爭

曰劉大行之清節人所不堪此士諤所親見者乃

止

象山縣志萬歷末年邑大疫忽一人儒冠道服貌甚

修潔語人曰西城內行祠後樟木大可數十圍枝

柯覆出城外蓋千餘年物也久飮霜雪其性清涼
可消疫氣曷削其皮煎飲焉如其言服之果愈疫
乃息其人不言姓名後亦不知所往人疑為仙家
者流肖像行祠祀之稱為樟樹先生

朱彝尊徐先生墓誌崇禎三年秋漳浦黃公道周來
典浙江鄉試榜既放以力學勗門弟子久之公以
言事獲罪出至杭州愛大滌山治精舍著書門弟
子皆從講學其後忠節則慈溪劉振之而強錢塘

姚竒引有僕經術則海寧朱朝瑛美之仁和孟應
春長民餘姚何瑞圖義兆書法則嘉興汪挺之無
上而徐先生伯齡節之以詩畫頡頏其門

靜志居詩話倪元璐尚書晚築室於紹興府城南隅
牕檻法式皆手自繪畫巧匠見之束手既成始嘆
其精工時方患目疾取程君房方于魯所製墨塗
壁默坐其中堂東飛閣二層扁曰衣雲凭闌則萬
壑千品皆在鳥下適石齋黃公至越施以錦帷張

燈四照黃公不怡謂公國步多艱吾輩不宜宴樂
尚書曰會與公訣爾既北行遂殉寇難

池北偶談寶應喬聖任可聘崇禎中以御史巡按浙
江至金華遇山水暴漲舟不得進索挽舟者縣令
盛王贊呼曰農忙矣令請以身挽喬遂改而陸行
仍薦之於朝時兩賢之

下方寺志余煌跋三元雲臥額云寺負山面流奇石
鑱削梧竹蒼鬱為山陰第一名刹士人多僦僧寮

以為藏修地先是山陰南石俞公咨益聚徒寺中
羅公萬化張公元忭皆從之遊隆慶戊辰羅廷試
第一越三年辛未張廷試復第一歲甲子煌亦肄
業此地明年乙丑臚唱亦先多士煌自揣疎陋何
能繼兩先生芳躅而迴念斗室嘯歌先後科名相
望爰新其廬顏曰三元雲臥亦足紀一時之盛云
西河詩話吳鍾繹進士崇禎末為廣西按察使甲申
以後遁至舟山中夜起自念潰然驚曰吾同牕馬

素修門下生李仲達俱已殉節吾年垂八十一旦
疾病身死將何以見數君地下急呼僕取火視已
面曰吾不病否僕曰不也乃伸紙作數詩且為札
召同行者飲於寓飲畢別去遂燔山中薪而竄身
其中其一詩有云只因老友相從急故遣臨行火
浣衣聞者流涕鍾巒字巒穉毘陵人

池北偶談順治甲午浙江熊鍾陵伯龍主試一榜狀
元及第者三人乙未史大成鄞人甲辰嚴我斯歸

安人庚戌蔡啟傳德清人

象山縣志康熙壬辰五月朔亭午無雲而雷聲甚烈
望之擊西山千丈巖下次日有好事者登山覓之
得一小石碑長尺餘濶六寸許鐫有靈符其碑陰
載宋邑令毛遇順為禳災立碑鎮此因捧歸遠近
傳視爭以硃砂摹碑貼室中却疫已瘡甚驗置匣
貯之藏石牕菴中

池北偶談范忠貞

謨承

撫浙日杭之西溪有虎攫人遣

卒往捕一日自詣水月和尚卜之告以故和尚答
云山頭大蟲任打門內大蟲休惹范不悟而去未
幾遷閩督遇逆藩之變竟以身殉始悟門內大蟲
之語

香祖筆記武林陸圻字麗京晚號講山隱居賣藥後
游嶺南禮天然禪師法名今龍又常游溫台諸山
中無定所或云有見之武當者終不詳其踪跡也
或以問洪昇昉思答以口號曰君問西泠陸講山

飄然瓶鉢竟忘還乘雲或作孤飛鶴來往天台雁
蕩間

香祖筆記會稽女子商婉人能詩工楷法常仿吳彩
鸞寫唐韻作廿三先廿四仙武林沈礪芳為題絕
句云簪花舊格自嫣然顆顆明珠貫作編始識彩
鸞真韻本廿三廿四是先仙

蘆浦筆記四明奉化縣凡七鄉皆有一管名如曰廣
平松賢履信鳴雁黃甘嵩溪靈泉棲鳳他處未聞

也

天祿識餘明州高亭鹽塢在海中或天宇晴霽時見如匹練橫天其色淡白則晴雨中分土人名之曰短蓬亦蜃氣之類也

象山縣志每歲六月十二日必有颶風皆云鋸門龍神實主之早禾正穎常為所敗康熙五十一年當事於南門外設牲醴望而祭焉果靜息不為災嗣後歲禱以為例

蘆浦筆記四明城北鹽倉之西有荆次飛廟無碑載
神姓氏攷淮南子荆有飲非得寶劍還渡江中流
暴風揚波兩蛟夾舟飲非謂漁船者曰有如此而
得活者乎曰未嘗見也於是飲非瞋目攘臂拔劍
曰武士可以仁義說不可劫而奪此江中之腐肉
朽骨弃劍而已余又奚愛焉赴江刺蛟遂斷其頭
舟人盡活今廟稱荆次飛侯圖經亦謂州北有蛟
池故老云蛟嘗自江來窟於此人患之故即其旁

立飲非廟以鎮之是則真以為荆之飲非矣然予
觀呂氏春秋荆有勇士飲非蓋是姓飲名非豈應
以神姓名為廟號而況加為侯封哉且次與飲非
與飛皆不同而好事者附會斬蛟之說以鎮蛟池
強名之傳流至今竟未有辨之者漢百官表武帝
太初元年更名左戈為飲飛掌戈射則飲飛之名
實始此又宣帝紀神爵元年發應募飲飛射士服
虔亦謂以材力名官若據建隆中鄧令金翅蔡興

記謂唐武德時為鄞州至開元中改鄞為明郡名奉化城號甬東地名句章軍號飲飛則此廟必因軍將之有功於人故人為之祠爾官於此者合討論而正其名庶幾神歆其祀也

墨莊漫錄寶陀山去昌國兩潮山下居民百許家以魚鹽為業亦有耕稼有一寺僧五六十人佛殿上有頻伽鳥二枚營巢梁棟間大如鴨鵝毛羽紺翠其聲清越如擊玉每歲生子必引去不知所之山

有洞其深罔測洞中水聲如考數百面鼓輦語不相聞其上復有洞穴日光所射可見數十步外三韓外國諸山在杳冥間海舶至此必有祈禱寺有鐘磬銅物皆雞林商賈所施者多刻彼國之年號亦有外國人留題頗有文采者洞前大石下有白玉晶瑩謂之菩薩石

居易錄寒山子有二皆載天台山志其一即寒山拾得文殊化身其一道士李褐遇貧士去數日復乘

白馬來謂褐曰頗知寒山子乎即吾是也

因話錄越州名僧二人一曰清江一曰清晝故號二清

七修類稿宋有杭州僧參寥唐亦有道士參寥見孟浩然集唐有蘭亭僧辨才宋亦有高僧辨才隱天竺見淮海集

湧幢小品東坡謂杭州有西湖如人之有眉目王梅溪謂越之有鑑湖如人之有腸胃

臨平記臨平古稱重鎮凡鎮皆有屯軍故許村稱寨
他可類推矣惜兵制古不可考蓋肇見於唐杭有
八都臨平曹信其一也迨高宗南渡於杭城外俱
置戎壘臨平蓋為要地德祐元年元人果從此而
入軍於臯亭馬入明建舖司於安隱寺西每舖設
兵船一兵四人有事則出哨海門無事則駐防寇
賊絕屯戍之擾得捍禦之嚴誠良法也

二老堂雜志臨安土人諺云東門菜西門水南門柴

北門米蓋東門彌望皆菜圃西門則引湖水注城中以小舟散給坊市嚴州富陽之柴聚於江下由南門而入蘇湖米則來自北關云

西溪梵隱志西溪有三橋多植柳濃陰夾道東西兩涯民居臨水花木周廬亦稱花市

香祖筆記宋時武林馬塍藏花之法紙糊密室鑿地作坎覆竹置花其上糞以牛溲硫黃然後置沸湯於坎中候湯氣薰蒸則扇之經宿而花放

辟寒部餘杭萬氏有水盆一尋常瓦盆耳然冬月以
水沃之冰凝成花跗萼檀藥皆成真花時為梅為
菊為桃李以至芍藥牡丹諸名花皆交出也萬氏
歲必一燕客觀冰花焉

夢溪筆談錢塘人有一劍削十大丁皆截而劍無纖
迹用力屈之如鉤縱之鏗然有聲復直如弦古之
所謂靈寶劍也

紫桃軒雜綴唐以前自杭至嘉皆懸流其南則水草

沮洳以達於海故水則設閘以啓閉陸則設棧以通行古胥山碑謂石棧自錢塘北抵禦兒之胥口乃其證也至今有石門斗門之名而其迹則湮於阡陌久矣

後山談叢浙西地下積水故春夏厭雨諺曰夏旱修倉秋旱離鄉浙東地高燥過雨即乾故春得雨即耕然常患少耳

富陽縣志富春土俗相傳凡近江處若樟巖山赤松

山鹿山之巔石上有絳纜痕土中有螺蚌殼驗之不爽因是見鼃子門未鑿則富陽錢塘為巨浸聞家堰未築則諸暨蕭山皆澤國也

嚴陵志張又新作煎茶水記載陸羽與李秀卿論水第為二十等而以揚子江中南冷水為第一嚴陵灘水為第十九又載劉伯芻言曰凡較水與茶宜者有七等而以揚子江中南冷水為第一嚴陵灘水不與焉又新自謂嘗挹而比之誠如其說又云

客有熟於兩浙者言搜訪未盡嘗志之及刺永嘉
過桐廬至嚴子灘其溪至清水色深翠家人輩用
陳黑壤茶發之皆至芳香又以煎佳茶不可名其
鮮馥也逾於揚子江南冷遠矣蓋又新所記云爾
而歐陽公乃取羽茶經論水謂山水上江水次井
水下山水乳泉石池漫流者上江水取去人遠者
井水取多汲者又新所載二說與茶經不合疑又
新妄附益之今州城北玉泉出烏龍山之麓其水

甘香尤宜茶殆所謂乳泉石池漫流者邪惜前此
未有知之者

菽園雜記嚴州山中灌田之法有水輪其制約水面
至岸高若干尺如其度為輪輪之輻以細木榦為
之每輻出柵處繫一竹筒但微繫其腰使兩頭活
動可以俯仰置軸半岸貫輪其上岸上近輪處置
木槽以承水溪水散緩則以石約歸輪下使急水
急則輪轉如飛每筒得水則底重口仰及輪至上

則筒口向下水瀉木槽分流田中不勞人力而水利自足蓋利器也

菽園雜記新昌嵎縣有冷田不宜早禾夏至前後始插秧秧已成科更不用水任烈日暴土不恤也至七月盡八月初得雨則土蘓爛而禾茂長此時無雨然後汲水灌之若日暴未久而得水太早則稻科冷瘦多不叢生山陰會稽有田灌鹽鹵或壅鹽草灰不然不茂寧波台州近海處田禾犯鹽潮

則死故作磳堰以拒之嚴州墾田多用石灰台州則煨螺蚌蠣蛤之灰不用人畜糞云人畜糞墾田禾草皆茂蠣灰則草死而禾茂故用之

嘉興縣志相河俗名相家蕩距城外東塔寺十餘里而塔影現湖中真如寺塔影映射殿壁七層皆具其影倒垂他處無有亦一奇也

靜志居詩話柿林今之新城鎮也去嘉興府治西北三十里近城本作滕宋魯公嘗監秀州新滕酒

稅

經鋤堂雜志雲川自唐末五代以來不經兵火此非
天幸蓋其地險可守也城外險處南路陸路當守
何山嶺水路當守衡山東門當守舊館昇山水路
當守河口毘山青塘門西門當守法華仁王山路
水路當守永壽北門水路當守大錢等處險不能
拒然後守城盡拆橋梁輦去石環城港汊皆施椿
陸路當掘坑用油泥芟葑暗施鐵蒺藜苦竹槍使

之川陸無路舟馬皆不可近城先之以守遠險次之以守近險然後守城是三重城也

靜志居詩話王氏為永嘉族望其先世毓生七子七子生二十八子二十八子生九十四子九十四子生二百六子二百六子生三百五十子三百五十子生四百九十子其枝葉亦繁昌矣

浙江通志卷二百八十